

07 FEB 2000

Gusmao-Lawat (Bergambar)/I

GUSMAO TIBA UNTUK LAWATAN TIGA HARI

SEPANG, 7 Feb (Bernama) -- Pemimpin kemerdekaan Timor Timur Xanana Gusmao tiba di sini lewat malam ini untuk lawatan tiga hari yang merupakan sebahagian daripada lawatannya ke negara-negara Asia bagi mendapatkan sokongan untuk membina semula wilayah yang musnah itu.

Pesawat yang membawa Gusmao mendarat di Lapangan Terbang Antarabangsa KL (KLIA) di Sepang pada pukul 11.55 malam.

Ketibaan Gusmao di Bilik Orang Kenamaan Bunga Mawar disambut oleh Ketua Setiausaha Kementerian Luar Datuk Abdul Kadir Mohamad.

Gusmao, Presiden Majlis Kebangsaan Penentangan Rakyat Timor (CNRT) dan mungkin menjadi presiden pertama wilayah itu, diiringi oleh pemenang hadiah Nobel Jose Ramos-Horta.

Sebelum ini, Gusmao melawat China, Korea Selatan, Singapura, Thailand dan Filipina.

Menurut kenyataan Wisma Putra, Gusmao dijadualkan mengunjungi dan mengadakan perbincangan dengan Perdana Menteri Datuk Seri Dr Mahathir Mohamad di Putrajaya esok.

Beliau juga akan mengunjungi Menteri Luar Datuk Seri Syed Hamid Albar dan Menteri Pertahanan Datuk Seri Najib Tun Razak.

Pelajar-pelajar Timor Timur turut berpeluang menemui Gusmao pada satu sesi khas yang diatur sempena lawatan beliau.

Selain itu, Gusmao dijadualkan melawat Unit Perancangan Ekonomi (EPU), Felda, Yayasan Salam dan Lembaga Pembangunan Perindustrian Malaysia (Mida).

Dalam satu pungutan suara anjuran Pertubuhan Bangsa-Bangsa Bersatu (PBB) pada 30 Ogos tahun lepas, rakyat timor Timur memilih mendapatkan kemerdekaan daripada Indonesia.

Lawatan beliau ke negara-negara Asia adalah usaha diplomatik pertama oleh kepimpinan Timor Timur sejak tamatnya pendudukan Indonesia selama 24 tahun di wilayah itu.

PBB kemudian menghantar Pasukan Antarabangsa (Interfet) yang diketuai Australia ke wilayah itu untuk mengawal keadaan apabila berlakunya rusuhan selepas pungutan suara itu dijalankan.

Interfet kemudian digantikan dengan Pentadbiran Peralihan di Timor Timur (Untaet) yang diketuai oleh Mej Gen Jaime de los Santos dari Filipina sementara wilayah itu membuat persediaan untuk kemerdekaan.

Malaysia menghantar 20 pemerhati tentera ke Untaet.

Semasa bercakap kepada pemberita kemudian, Gusmao mengucapkan terima kasih kepada Kerajaan Malaysia di atas sokongan dan sumbangan kepada Timor Timur dalam proses wilayah itu mencapai keamanan.

Gusmao berkata beliau akan menemui Dr Mahathir esok bagi mendapatkan nasihat dan bantuan beliau bagi pembinaan semula Timor Timur.

-- BERNAMA

NY MAM NAK